

李文忠公奏稿

李文忠公奏稿

卷之二十五目錄

丁憂道員懇准終制摺

光緒元年正月十九日

淮軍雜支分別核辦片

光緒元年二月十二日

輪船招商請獎摺

光緒元年二月二十七日

宣化無兵防塔坡摺

光緒元年三月十三日

福濟請卹摺

光緒元年三月二十三日

調兵助剿奉省摺

光緒元年四月初九日

劉盛藻回籍終制片

光緒元年四月初九日

陳蘭彬議辦華工片

光緒元年四月十二日

防軍試墾稻田片

光緒元年四月二十九日

曾國藩請建省城專祠摺

光緒元年四月二十九日

督辦北洋海防謝摺

光緒元年五月初十日

防邊各軍仍准給雜支片

光緒元年五月初十日

張家口糧臺請部餉摺

光緒元年五月十七日

籌濟奉省軍火片

光緒元年六月初六日

德國兵官請給寶星片

光緒元年六月初六日

祕魯換約摺

光緒元年六月十一日

請派丁日昌商辦換約片

光緒元年六月十一日

周盛傳陳濟清互調片

光緒元年六月二十九日

自省遞津添驛片

光緒元年六月二十九日

祕魯換約事竣摺

光緒元年七月初八日

請遣使赴祕魯片

光緒元年七月初八日

嚴防誘拐華民片

光緒元年七月初八日

准軍西征報銷摺

光緒元年七月二十八日附清單

軍營交涉洋務銷冊片

光緒元年七月二十八日

軍營柴草議價核發片

光緒元年七月二十八日

西征扣曠片

光緒元年七月二十八日附清單

李文忠公奏稿卷二十五

全集一之二十五

桐城吳汝綸編錄

丁憂道員懇准終制摺

光緒元年正月十九日

奏爲丁憂道員籲懇

恩准扶輿歸葬在籍終制恭摺據情代陳仰祈

聖鑒事竊

臣於正月初一日由京旋省接據遇缺題奏按察使前

天津道丁壽昌稟稱恭閱邸鈔同治十三年十二月二十四日奉

上諭御史李桂林奏請將丁憂道員破格留用一摺前任天津道

丁壽昌現在丁憂開缺既據奏稱該員潔己愛民輿情感戴著俟

百日孝滿後准其留於直隸交李鴻章差遣委用該部知道欽此

聞

命之下感激涕零惟念壽昌係屬孤子並無同胞兄弟自幼失恃

賴親父撫育教誨得以成立少出就傅問視既疏中歲從戎睽違
更久近年迎養道暫方期稍盡烏私乃親父遽爾見背生已不能
盡養歿若不克終制何以爲子何以爲人本擬卸篆後卽行扶輿
歸葬緣經手公件尙未交代清楚兼奉親父遺命回里道遠須由
水路南行時值冬令河凍俟春融扶柩匍歸守制茲忽奉留直委
用

諭旨哀迫焦惶罔知所措伏思

聖朝以孝治天下卽軍營奏留丁憂人員事竣仍令回籍補行守
制定例某嚴況直省現無軍務差委正不乏人竊計壽昌居喪之
日無幾報

國之日甚長叩乞據情奏懇

恩施俯准扶輿歸葬在籍終制一俟服闋遵

管來直聽候差委等情前來臣查丁壽昌自同治元年隨臣帶勇剿賊疊次勦平野捻功績頗多迨九年委署天津道適值民教滋事撫循彈壓威惠兼施嗣補授是缺津郡連年水災百姓蕩析離居該道力籌賑卹扶危濟困至活甚眾開河築隄興利除害百廢具舉遠近感頌上年十月丁父憂解職士民廝道攀留如失所依臣在津日弊情形曾面商該道扶輓歸葬後當再奏調來直以慰民望該道堅辭請准終制未忍拂其孝思是以上年十一月津郡紳耆李世珍等合詞赴臣行轅稟留當經照例批駁旋奉特旨准俟百日孝滿後留直差遣嗣後丁憂人員不得援以爲例仰見

朝廷愛惜人才慎重地方至意臣於上年十二月二十六日
陛辭時仰蒙

兩宮

皇太后垂詢丁寧口官聲甚好臣具以實對方幸襄助得人乃出京後卽據該道稟陳前因情詞懇迫委係出於至誠現計該道自見喪之日起迄今已逾百日而父柩未歸人子之心惘然有所難安合無仰懇

聖恩准其扶輓歸葬終制俟服闋後來直委用以示格外體恤如該道未屆服闋直境或有緊急要務必須助理再由臣隨時酌核奏調是否有當伏乞

皇太后

皇上聖鑒訓示遵行謹

奏

淮軍雜支分別核辦片

光緒元年二月十二日

再臣前奏淮軍柴草油燭用款請照案核銷一片奉

硃批著照所請戶部知道欽此經戶部將已入奏銷之西征第一

案自同治九年四月起至十年十二月底止柴草油燭銀兩遵

旨准銷並以軍需例載官兵日給口糧量給柴薪以資食用並無

柴草油燭折價名目嗣後軍需報銷須照定例章程辦理所有此

項柴草油燭折價應即刪除等因於同治十三年十月二十九日

奏明知照前來臣維定例官兵於日給口糧外量給柴薪原為體

恤兵艱免致騷擾百姓蓋口糧無多未能兼顧炊爨之費若令自

行樵采則一草一木無非小民辛苦所餘豈容軍民爭取況各軍

現多分紮臺灣天津上海等處海濱斥鹵實亦無可樵采至油燭

為巡更放哨所必需更難歷久賠補向來綠營武職歲支之項有

俸銀又有薪銀及蔬菜燭炭等銀皆詳載則例軍士效力行間親
冒霜露銖鎰較之綠營武職艱苦十倍若不量予支項焉能得其
死力此項柴草油燭本歸正用並非濫支例內固早有此名目湘
淮各軍酌予支給折價係仿照例意辦理節經奏報准銷有案今
戶部既令嗣後一律刪除應於此次奉文後從光緒元年正月
起暫行停支另照例章核辦所有同治十三年以前循案已經發過
淮軍各營柴草油燭折價銀兩係在未奉部文截止以前該弁勇
等久經領用礙難紛紛追回致索軍令合無仰懇

天恩敕部俟造報時仍照案核銷以清界限而免轉轉理合附片
陳請伏乞

聖鑒訓示謹

奏

輪船招商請獎摺

光緒元年二月二十七日

奏爲前保輪船招商出力員紳與津通驗收轉運漕糧人員無涉謹詳細聲明仍請照擬給獎恭摺仰祈

聖鑒事竊臣前因創辦輪船招商在事員紳歷年苦心經營有裨大局於上年漕竣時擇尤奏請獎敘聲明與津通驗收轉運漕糧人員無涉應不併計等因並以此事實關海防根本洋務樞紐鈔奏咨請總理各國事務衙門查核各在案茲吏部以未將緣何與津通驗收轉運人員無涉應不併計之處詳細奏明應令覆奏再行核辦等因知照到臣伏查各國通商以來火輪夾板日益增多行駛又極迅速中國內江外海之利幾被洋人佔盡且海防非有輪船不能逐漸布置必須勸民自置無事時可運官糧客貨有事時裝載援兵軍火藉紓商民之困而作自強之氣且各口華商因

無官辦章程多將資本附入洋商輪船股內尤非

國體所宜臣於同治十一年五月間議覆製造輪船未可裁撤摺
內曾籌及商船一節經總理衙門奏覆應山該督撫隨時察看情
形妥籌辦理復兩屬遵諭有心時事之員妥議章程等因臣卽於
是年夏間商令道員朱其昂等酌擬輪船招商章程設局招徠俾
華商原附洋商股本歸併官局購造輪船運糧攬貨以濟公家之
用略分洋商之利緣此事本係創始凡聯絡官商招集股本選買
船隻雇用管駕並於各口建立棧房碼頭事體極爲煩重籌辦極
爲艱難華商初猶觀望洋人又復嫉忌往往跌價相爭非開誠布
公堅持定見不足以服眾而自立該員紳等苦心經營力任艱鉅
竟底於成頻年疊加開拓漸收利權計有自置輪船並承領閩廠
輪船八號現又添招股分向英國續購兩號分往南非洋各海口

及外洋日本呂宋新嘉坡等處貿易疊次裝運江浙漕糧上年秋
間承載銘軍赴臺灣轉運糧餉源源接濟均能安速無誤從此中
國輪船可期暢行實爲海防洋務一大關鍵所裨於

國計民生殊非淺鮮該員紳等不無微勞足錄自應及時鼓勵臣
前奏運漕出力不過略舉一端要之創辦輪船招商勞績非尋常
局務等項可比更與津通驗收轉運人員絕無干涉應不併計相
應詳細聲明仰懇

天恩准將原保道員朱其昂等照擬給獎以資觀感理合恭摺覆
陳伏乞

皇太后

皇上聖鑒訓示謹

奏

宣化無兵防塔城摺

光緒元年三月十三日

奏爲宣化官兵不敷分布難再調赴塔城駐防恭摺覆陳仰祈

聖鑒事竊臣承准軍機大臣字寄光緒元年二月初十日奉

上諭英廉奏大同官兵業已到防宣化官兵五百名尙無起程信息請飭派往等語著李鴻章查明酌量調撥等因欽此遵查前奉

同治十二年八月十六日

寄諭榮全英廉奏查看額魯特官兵並沿途臺站情形請調宣大官兵駐防塔城各摺片塔城向有甘省換防兵七百名駐紮防守近因道路未通難以調派著暫於宣化官兵內挑撥五百名赴塔駐防俟嘉峪關道路疏通再照舊章由甘省撥兵換防等因欽此當卽恭錄轉飭宣化鎮總兵王可陞欽遵妥辦惟查宣化鎮原設額兵五千墩百名近年口外多事征調頻仍現計底營僅存二

千一百餘名不及原額之半該鎮東鄰熱河西通晉隴直接歸綏
北抵察哈爾沙漠游牧邊牆綿亘千餘里實爲近畿屏蔽沿邊一
帶時有馬賊窺伺多倫廳又孤懸口外五百餘里汛地處處緊要
兵力殊形單薄且營路當衝本有遞送差務加以西北各路軍營
糧餉軍火改從張家口出邊撥兵護送絡繹於道而該鎮練軍復
調赴庫倫一千名僅存馬步七百餘名巡防口隘萬不可少同治
十二年正月間臣覆奏烏里雅蘇臺調兵案內欽奉
上諭宣化古北口存兵無多捍衛畿輔彈壓地方未便再議抽調
烏城儘必須步隊協防仍著咨商張廷岳等於庫防練軍內酌量
抽撥就近赴烏等因是年八月間臣請留宣化原駐烏城防兵並
挑派換班官兵案內復將該鎮存兵無多無可再議抽調情形陳
明在案是以綱奉塔城調兵之

旨因無兵可調經奏明在先遂未再行覆陳茲奉

諭仍飭臣查明酌量調撥伏查宣化出張家口西至塔城共一百
十餘臺計在萬里之外兵士遠行遲滯糜費甚多當此度支艱難
臺站疲乏亦不得不酌度緩急英廉等本因甘省道路未通暫調
宣大官兵係屬一時權宜之計並奉有嘉峪關道路疏通照舊由
甘省撥換之

諭目下肅州克復甘省肅清已久兵力可分金順一軍早抵巴里
坤計過嘉峪關二千餘里道路實已通行且甘省額派塔城換防
兵七百名今大同派往五百名僅短二百名似應欽遵前奉

諭旨仍照舊章由甘省就近派往以符定制儻將來塔防必須添
調直兵應請於調駐庫倫之宣化古北口練軍二千名內酌量抽
撥若干移緩就急亦屬兩便所有宣化存兵不敷分布實難再調

緣由理合恭摺陳伏乞

皇太后

皇上聖鑒訓示謹

奏

福濟請卹摺

光緒元年三月二十三日

奏爲已故大員勲勞卓著懇

恩開復原官優予

賜卹以彰忠藎恭摺仰祈

聖鑒事竊查頭品頂戴原任烏里雅蘇臺將軍福濟於光緒元年三月初十日在旗病故查該故員於道光年間由翰林擢任吏戶兵工各部侍郎久躋清要洊膺外任咸豐四年由漕運總督蒙

文宗顯皇帝調授安徽巡撫其時正值廬州失陷前撫臣江忠源殉難之後皖北糜爛已極賊氛徧地一夕數驚該故員草創軍旅收集潰散與提臣和春鄭魁士等竭力商辦勉圖恢復踰年攻克廬州府城又疊克含山舒城三河集縣廬江各城隘稍足自立而兵力既單餉源奇絀於萬難措手之際設法經營徒以忠義血誠

激勵飢軍捍禦狂寇五年之間屢瀕危險卒能支持大局俾烽火
殘黎不致淪陷其保障江北之功誠不可泯同治三年復奉
命督師川北籌措兵食撫輯流亡心力彌瘁嗣由西甯辦事大臣
調任布倫託海科布多烏里雅蘇臺各處邊塞馳驅無一非困慮
危心之境九年在將軍任內因公獲咎旋蒙
穆宗毅皇帝鑒其無他

加恩賞還原銜花翎在案伏念該故員受

命撫皖臣正奉

旨在籍辦理團防朝夕追隨其事最久親見其艱苦困厄實非人
所能堪而治軍之暇整飭吏治存問瘡痍事事皆求實際遺愛在
人兩淮父老至今猶追慕之該故員清勤正直宣力中外幾四十
年每以受

恩深重未能圖報爲憾且其家屬前在烏城同時殉節回旗後僅有孤孫善佺一人侍奉因軍營年久積受寒溼腿疾增劇遽爾病歿身後蕭然殊可惻惻竊查近年如前貴州撫臣張亮基前陝西撫臣劉蓉前湖南撫臣卞世臨前安徽撫臣翁同書皆以被議人員身故後由各督撫查明勞績奏蒙

特恩開復原官分別議卹該故員老成碩望厯事

三朝政績卓著其撫卹賊最久而勦勞亦多臣籍隸皖省知之尤詳用敢據實瀝陳可否仰懇

天恩准將頭品頂戴原任烏里雅蘇臺將軍福濟開復原官敕部

照將軍例從優議卹以彰忠肅出自

逾格鴻慈所有已故大員勦勞卓著懇

恩賜卹緣由理合恭摺具陳伏乞

皇太后

皇上聖訓示誥

奏

調兵助剿奉省摺

光緒元年四月初九日

奏為遵

旨調撥馬步練軍馳赴奉省助剿恭摺陳仰祈

聖鑒事竊臣承准軍機大臣字寄光緒元年四月初四日奉

上諭崇實奏邊匪盤踞請調馬步練軍及時剿撫一摺著李鴻章

卽於直隸調撥步軍洋鎗礮隊一千名馬隊五百名由海道星速

前往並著選派得力巡哨大輪船二隻駛赴大東溝後各海口以

資策應等因欽此遵查直隸練軍無多餉源支絀不難遽調遠役

惟奉省為

國家根本重地目下剿匪喫緊應卽移緩就急暫行調撥以顧大

局當經酌派天津鎮總兵陳濟清所部雲字馬勇兩營計四百名

又天津練軍洋鎗步隊兩營計一千名共合馬步四營一千四百

名陳濟清樸誠勇幹人經行陣卽併交該總兵統領迅速前往馬
隊山陸路分起出關步隊由輪船分載進發歸崇實節制調遣所
需月餉各項飭海防支應局照章核支源源籌濟軍火鍋帳一切
亦飭作速備齊其步隊航海雇用輪船價銀並由支應局核給彙
報至北洋巡哨輪船營口本有涓雲一號現已開赴孤山洋面協
剿臣復飭該管帶官屬宗年卽聽崇實調遣月派津口鎮海輪船
飭管帶官千總陸倫華隨後駛往策應所遺天津鎮總兵員缺緊
要查有記名提督鄭國魁樸實老練謀勇兼優檄飭該員接署以
便陳濟清卽日交卸統軍啟行至此項練軍馬步隊皆爲津郡海
防而設地當衝要未可日久空虛臣已緘商崇實俟奉省勦賊稍
有就緒卽令凱撤回津俾資控扼除分咨查照外所有調派馬步
練軍赴奉省助剿緣由理合恭摺由驛覆陳伏乞

皇太后

皇上聖鑒謹

奏

劉盛藻回籍終制片

光緒元年四月初九日

再布政使銜遇缺題奏按察使劉盛藻自同治十一年冬開遵旨赴陝接統銘軍實力整頓克成勁旅嗣該臬司在營聞訃丁憂經前陝西撫臣邵亨豫奏奉

上諭飭令劉盛藻將陝防事宜照常辦理俟甘境肅清再奏請回籍終制等因欽此嗣蒲州克復又

奏准給假兩箇月回籍營葬上年日本構釁生番經臣

奏派記名提督唐定奎率所部洋鎗隊十三營赴臺防剿並調劉盛藻迅統銘軍馬步各營馳赴山東濟甯及江南徐州一帶扼紮以備南北海防策應該軍抵防以後卽撥吳宏洛五營駐防上海吳淞要口其餘分布徐濟各處布置策應尙臻周密復據該臬司籲懇回籍終制等情請

奏前來臣查該臬司治軍嚴整統率銘軍十餘載立功最多前次丁憂留營不因陝防喫緊茲該軍檄調東來軍務稍鬆自應欽遵前

行准暫回籍終制以遂孝思所遺銘營查有記名提督劉盛休樸誠勇敢曉暢戎機前曾代統銘軍經理營務辦理妥協將士亦深悅服堪以委令接統除仍由臣隨時督飭認真訓練察酌調遣外理合附片陳明伏乞

聖鑒謹

奏

陳蘭彬議辦華工片

光緒元年四月十二日

再臣於同治十年七月間會同前大學士兩江督臣曾國藩奏派委員四品銜刑部主事陳蘭彬江蘇候補同知容閎攜帶幼童出洋肄業陳蘭彬等卽於十一年夏間帶領頭批幼童赴美國哈富地方寄居分派各館學習文藝十二三年復選各省聰穎子弟分起送往本年續送四批已等奏定一百二十人之數據陳蘭彬等稟稱駐洋各幼童肄業洋文粗有蹊徑俟其嫻熟卽須就性質所近分門別類專心研求以裨實用該委員等布置督率悉臻周妥惟上年總理各國事務衙門因古巴招工陵虐華人奏派陳蘭彬就近往查事竣仍檄調該員回京以備與日斯巴尼亞使臣辨證一切該員自十二年冬馳赴古巴去冬回京馳驅險遠辛苦備嘗以致照料幼童未能兼顧現在總理衙門正與各國公使議辦

古巴華工章程實賴該員從旁贊助勢難遽離而幼童駐洋事宜亦關緊要自應遴派妥員速往接辦以昭慎重查有工部候補主事區謬良籍隸廣東由翰林院庶吉士改授部曹年力正壯志趣堅卓洋務亦頗講求堪以委令出洋會同原派委員容閱常駐美國經理幼童肄業各事藉資造就擬請

旨敕下總理衙門暨工部仍照出差人員向例辦理將來如有成效再由臣等從優酌保以示鼓勵至陳蘭彬識力誠毅廉正可靠駐洋三年籌辦要務均極精詳擬俟古巴華工定案後請由總理衙門酌核保奏俾旌勞勩嗣後若駐洋幼童有必須該員前往經理之處或另有海外差遣要件該員雖年已六旬當可勉力一行除咨南洋通商大臣知照外理合附片具陳伏乞

聖鑒訓示謹

奏

防軍試墾稻田

光緒元年四月二十九日

再臣欽奉同治九年十月二十日

上諭畿輔水利本宜講求而畿東尤亟應如何設法宣洩以利農
田著次第興辦等因欽此當經臣於裁撤三口通商大臣酌議應
辦事宜先陳大略摺內聲明妥籌試辦並歷年督飭地方官於各
河道上下游濬河築隄興復水利疊經奏陳在案惟查津郡自元
時設官耕屯後旋作加輟迄少成效因由海濱斥鹵難消易淤亦
由地利人工開墾未盡如法咸豐九年親王僧格林沁督兵津郡
於鹹水沽營田三千五百四十畝葛沽營田七百五十畝同治三
年前通商大臣崇厚復派員勘辦由官給資招佃承種同治八年
職員趙佩蘭呈請交銀認種不領官本每年交租二百石詎十年
以後鹹遭水患田廬耕具漂沒無存經臣節次奏免租項而趙佩

蘭以田畝全荒無力承墾呈請退佃由天津道吳贊誠委勘屬實
詳請咨部暫停租課另行設法招墾至軍糧城稻田同治五年崇
厚遵

旨試墾四百七十餘頃計成熟者不過十分之一亦因連年被水
漸就荒蕪據天津道詳請改歸練軍及護衛營勇試墾此民墾水
田難得實效之明驗也惟是津東鹹水沽一帶荒地承種無人曠
廢可惜只有激厲防軍倡率興辦臣商令統帶盛仁等營遇缺題
奏提督廣西右江鎮總兵周盛傳於上年修築新城之暇往來察
勘先在新城以南挑濬引河一道分建橋閘溝洫洞試墾萬畝
稍有收穫本年該鎮復督飭弁勇挑鹹水沽以下引河四十餘
里而寬六丈底寬二丈達於新城外河分注各溝順城東開口入
海河並建石閘三座大橋四道於田間搭造莊房以便耕作本年

暫就引河兩岸開田疏濬由近及遠據勘明海河附近閒有墾熟地段其餘南至邢口東迤葛沽新城百里內外皆爲廢地閒有民人認過糧草課爲數無多且有自明季認墾刻下旣非本主又已荒廢者除鹹水沽左近借用民閒旱糧地畝已分別等差折價給領其向未墾熟之地仍酌給種費以示體恤惟目下雖就軍力試墾而開河建閘挑溝築圩以及買牛蓋屋添置農器水車需費甚鉅姑於該軍月餉內設法挪墊俟稍田有收陸續歸扣以資軍食現閒地段內有民戶認過糧草課若干俟查丈清楚飭縣銷除糧額暫由該營照數完納至將來荒田墾熟後如何分給民種按則升科容再體察情形妥議章程具奏伏查津郡爲京畿屏蔽現值海防緊要力圖富強則開辦屯田籌備軍食無事時藉興稼穡之利有事時可限戎馬之足實爲經久良圖臣與周

盛傳再四諮議欲慨新城附近荒田非在鹹水沽建閘增挑引河
導潮東灌不可欲大墾海河南岸荒田非由南運河上游建閘片
開減河分溜刷鹵不可第士卒過勞工費過大非可剋期告竣現
僅就兵力所及竭蹶經營先於鹹水沽新城一帶試辦仍俟辦有
成效騰出軍力再籌挑南運減河由下節節而上漸求開拓期於
設東水利海疆防務兩有裨益除飭該鎮會同天津道妥細查勘
次第興辦仍將一切未盡事宜隨時核議詳奏外所有防軍試墾
鹹水沽一帶稻田情形除咨明總理各國事務衙門暨戶部知照
外理合附片具陳伏乞

聖鑒訓示謹

奏

曾國藩請建省城專祠摺

光緒元年四月二十九日

奏爲已故督臣遺愛在民據情奏懇

恩准建立專祠崇祀名宦恭摺仰祈

聖鑒事竊據藩司孫觀宗司范梁清河道葉伯英曾詳據保定府紳士賀錫福等稟稱原任大學士兩江總督曾國藩自同治七年調任直隸時值捻氛甫靖該督臣苦心經理澄敘官方禮賢清訟選將練兵興舉水利賑卹災荒籌政班班不可殫述前津郡稟請建祠業蒙奏准省城爲首善之區士民愛戴尤深籲懇捐建專祠春秋致祭並據直省紳耆進士王振綱翰林院庶吉士辛家彥等公呈請將前督臣曾國藩崇祀省城名宦祠各等情請

奏前來臣查該故督臣調任畿輔兩年舉賢任能吏治爲之肅清他如治河練兵次第籌辦皆有成效於地方利弊切實講求綱紀

漸立廢墜具修其在任時清理通省訟獄積案數萬件去任後籌助天河水災賑銀二十萬兩尤爲人所難能功德在民久而弗替既據台詞環請出於至誠相應據情籲懇

天恩准於保定省城由該紳士等捐建前督臣曾國藩專祠由地方官春秋致祭並准附祀省城名宦祠以順輿情而彰忠盡理合恭摺具

奏伏乞

皇太后

皇上聖鑒訓示謹

奏

督辦北洋海防謝摺

光緒元年五月初十日

奏為欽奉

諭旨恭謝

天恩先陳大略仰祈

聖鑒事竊臣承准軍機大臣傳寄光緒元年四月二十六日奉

上諭著派李鴻章督辦北洋海防事宜所有分洋分任練軍設局

及招致海島華人諸議統歸該大臣等擇要籌辦等因欽此仰見

朝廷力圖自強戒備不虞至意欽感曷任臣伏思今日中外交涉

局勢為千古所創見此開海防籌辦機宜較他處而尤難凡事非

財不行而北洋三省財力最窘則無可籌之款凡事非人不舉而

北省文武洋務多生殊乏可用之材惟是

京畿門戶所係各國觀聽所屬若因循不辦終懼無以自立若切

實大辦祇愧力不從心臣謬任通商數年於茲外示騶虞每遇事
變之來徒恃鎮靜內修備禦究其竭蹶之狀實倍尋常茲復渥荷
恩綸畀以督辦海防重任微臣智術短淺才識庸愚雖略悉彼此
強弱之形適當茲經費支絀之地旁皇無措展布何從惟有懍遵
聖訓擇其最要者不動聲色先行試辦儘其力之所能及守其分
之所當爲認真籌畫仍隨時隨事與總理衙門暨南洋督辦大臣
沈葆楨會商切實次第布置續行陳奏所有欽奉

諭旨恭謝

天恩先陳大略緣由理合繕摺具奏伏乞

皇太后

皇上聖鑒謹

奏

防邊各軍仍准給雜支片 光緒元年五月初十日

再直隸練軍餉章有應支柴草銀兩原為體恤兵艱免致騷擾百姓經戶部覆核奏准歷年支銷有案上年部議忽令停支臣已分飭該營暫停片照例章核辦茲據宣化鎮總兵王可陞轉據統帶宣化練軍出防庫倫之游擊徐平川稟稱該軍與古北口練軍共馬步隊二千人自同治十年先後調赴庫倫防剿塞外寒苦無可樵采且蒙古地面各有愛曼管轄亦不能自辦柴草經庫倫辦事大臣飭將所領柴草銀兩盡數交給庫倫糧臺轉交愛曼代為采買價值不敷復於每年十月起至次年四月底止由庫倫大臣每月加給該軍柴草銀二百兩交愛曼添辦應用經庫倫奏明有案該處一片沙漠氈房靡定村落毫無夏月僅產青草數寸秋季概成平地現在附近樹木伐售已盡須至三四百里以外始能覓購

搬運愈遠腳價愈多庫倫百物昂貴較內地加價至數倍或十數倍不等士卒甚形拮据今停發柴草銀兩卽無以供炊爨冬春風雪嚴寒更有手足皸瘃之苦日擊艱窘情狀委難停支仍請照常給領其古北口出防庫倫練軍同係窮邊戍守並請一律照辦等情前來臣查練軍官兵夫步隊全營五百數十人月僅支柴草銀百四十兩馬隊全營三百餘人月僅支銀八十兩本爲軍中所必需況塞外非內地可比額領之外尙須由庫倫加銀添辦據稟情形足見采購之難該兩軍遠役勞苦疊經勦賊著績若分內支項遞行裁減實不足以資飽騰應請將宣化古北出防庫倫練軍柴草銀兩仍照原奏定章接文至津郡練軍調赴奉天助勦本係行隊趨向無定該省勦匪喫緊正資客軍之力儼因樵薪細故騷擾閭閻或貽誤軍事所關殊非淺鮮應一併照章支給統俟撤回

再照本省各營辦理仰懇

大恩俯賜允准以勵我行而示體恤理合附片陳請伏乞

聖鑒訓示謹

奏

張家口糧臺請部餉摺

光緒元年五月十七日

奏爲張家口糧臺懇

恩照案續撥部餉恭摺仰祈

聖鑒事竊查前因烏里雅蘇臺等處調兵防剿遵

旨任張家口設立糧臺辦理各路軍糧奏明請撥部餉以資接濟

計自同治九年十二月起至十三年止七次奏撥部餉銀二十一

萬兩飭委口北道分起辦理截至十三年年底止實存正款餘平

共銀二萬六百九十五兩零均經造報在案茲據署口北道博多

宏武稟稱駐紮庫倫之宣化古北口練軍應需米麪已運半年有

餘現仍陸續運發秋冬之糧駐紮烏里雅蘇臺之察哈爾吉林黑

龍江官兵應需口糧亦已辦運半年前存銀兩除已支外僅存銀

二千兩有奇不敷支用請速奏撥等情前來臣查該署道所稟委

係寶情相應仰懇

天恩飭下戶部照案續撥餉銀三萬兩仍照章由該糧臺派員領解以濟要需所有張家口糧臺請照案

敕撥部餉緣由理合恭摺具陳伏乞

皇太后

皇上聖鑒訓示謹

奏

籌濟奉省軍火片

光緒元年六月初六日

再臣欽奉四月二十六日

寄諭崇實奏請飭直隸籌撥軍火等語現在奉省操演洋鎗等隊
急需軍火著李鴻章在天津機器局內迅速籌備等因欽此並准
崇實咨商片行借撥鎗礮等項當飭局迅速籌備旋准派委協領
德印等來津隨撥給洋鎗藥七千磅大銅帽八十萬粒上洋礮藥
四千斤三寸五木信一千七百六十箇三寸九木信四百四十箇
銅管門火四千枝三寸九炸子四百顆三寸五炸子一千六百顆
二寸鐵子八百顆二寸二羣子八百箇鉛箭四十萬出鉛丸四十
萬粒馬洋鎗三百桿步手鎗一百桿配發小銅帽五萬粒竹矛一
百四十根十二磅開花礮六尊四輪礮車六輛照配三十六分二
徑合膛開花子六百顆木信六百六十箇十二磅銅田雞礮四尊

德國兵官請給寶星片

光緒元年六月初六日

再本年三月間德國駐京使臣巴蘭德來津接晤據稱該國駐華較遠既無邊界毗連又無傳教及販賣洋藥等事可與中國永遠實心和好將來若欲派人赴泰西學習船政軍政他國縱有恪商彼國必當盡心幫助並擬將該國現駐香港兵船調至大沽洋面請臣看操等語臣因其詞意極為恭順當即允行五月十九日據德國領事官璧斯瑪函報該國雅里阿特兵船奉調後於二十日可至大沽臣即於二十一日率同津海關道黎兆棠及天津鎮道將弁馳赴大沽口外八十里洋面該總兵官操舟前迎船桅升挂中國龍旗放礮十九響迎送乃係西洋極隆重之禮臣親臨該船閱看操練其弁兵步伐整齊技藝嫻熟鎗礮器具均極精堅操畢即面加獎勵賞給該船兵丁銀牌三百面臣仍於次日回津據黎

兆棠稟稱該總兵官副將等欲得

欽賜寶星以爲榮寵臣思外交之道與自強之謀相爲表裏德國近年發奮爲雄實與英俄各邦並峙今仰慕

聖朝威德情殷效順自應相機聯絡予以體面藉事鞏縻該船總兵官等職分較崇且不遠數千里而來專請閱操執禮甚恭殊堪嘉尚臣仰體

朝廷柔遠之仁飭道仿製頭二等寶星各一枚由臣傳

旨賞給該總兵副將以示光寵而資觀感是否有當除咨總理各國事務衙門知照外謹附片具陳伏乞

聖鑒訓示謹

奏

祕魯換約摺

光緒元年六月十一日

奏為祕魯使臣到津請將上年議定通商和約並查辦華工專條及時互換擬請

欽派大臣以便商辦恭摺仰祈

聖鑒事竊照祕魯國使臣葛爾西耶於同治十二年九月來津求立和約十三年三月間欽奉

諭旨派臣與之會商旋經臣與該使臣議定通商條約十九款並訂明查辦華工專條於上年五月十三日公同畫押蓋印約內聲明兩國

批准即

特派大臣或在上海或在天津會晤互交當由臣奏明將原本進呈在案本年六月初六日祕魯使臣愛勒謨爾由日本到津函稱

現奉該國特派前來互換條約訂期謁晤臣卽於初七日接見初九日答拜告以前定和約及專條本應互換惟去歲七月間曾派管帶幼童出洋委員同知容閔赴該國密查月餘據其稟覆華工在祕魯各處山寮仍不免有陵虐之事須與商量辦法再將前次議定條約一併互換該使堅稱奉命來華專換已定之約不能另議他款若必另議須俟換約後妥商且前定查辦華工專條內已載明受苦華工由中國委員知照地方官傳案訊斷其合同期滿無力回國者由祕國備資送回各等語將來但有委員前往查辦祕魯必應照約辦理目前只求代爲具奏請旨派定換約大臣以便迅速商辦旋於初十日該使復將該國批准和約及專條並派員來華互換上諭三件照譯底稿飭送前來臣思條約已訂明或在天津互換臣又係原議之員未便壅於上

聞致失大信自應查照歷屆成案請

旨飭派大員就近在津與祕魯使臣將上年所立條約互換並商辦以後保護華工事宜仍請

敕下總理各國事務衙門知照內閣將祕魯漢洋字合訂條約及專條一分恭用

御寶迅速發交換約大臣祇領遵辦除將祕使鈔送該國上諭三件照鈔恭呈

御覽並咨總理衙門知照外所有祕魯條約據情懇請互換緣由謹繕摺馳陳伏乞

皇太后

皇上聖鑒訓示謹

奏

謹將祕魯使臣譯送該國上諭三件底稿照鈔恭呈

御覽

上諭五月十三日與中國所訂通商和約業於八月二十六日經選舉國會紳耆大臣公同議允朕自當照例批准收此和約卽行畫押布告本國一體遵照欽此

甲戌年九月初四日

大伯理璽天德畫押發出並有總理衙門大學士阿古耶勒畫押上諭五月十三日與中國所訂專條業於八月二十六日經選舉國會紳耆大臣公同議允朕自當照例批准收此專條卽行畫押布告本國一體遵照欽此

甲戌年九月初四日

大伯理璽天德畫押發出並有總理衙門大學士阿古耶勒畫押

上諭五月十三日本國與中國所訂通商和約現已議允自當派員前往互換今有愛勒謨爾公務練達又係前辦此事熟手因特派往駐劄中華並與以全權便宜行事與中國大臣換約諒能和睦相濟益敦睦好欽此

甲戌年十二月十七日

大伯理璽天德畫押發出並有總理衙門大學士阿古耶勒蓋押

請派丁日昌商辦換約片

光緒元年六月十一日

再前江蘇撫臣丁日昌奉

旨來津商辦事務業於五月二十七日抵津臣與朝夕晤商該前

撫傳述

陛辭之日仰蒙

兩宮

皇太后訓勵

微臣

各語以勝感激涕零該前撫熟悉洋務操縱悉

合機宜此次祕魯換約雖屬照例之事惟訪聞華工在彼人數頗

多受苦情形幾與古巴相等臣擬於前定查辦專條互換時再由

換約大臣給予照會令將以前虐待華人各情弊嚴為禁革庶委

員前往查辦較有依據丁日昌素為洋人所敬服若蒙

特派該撫臣就近互換商辦似更得力是否有當附片具陳伏乞

聖訓示謹

奏

周盛傳陳濟清互調片

光緒元年六月二十九日

再臣承准軍機大臣字寄光緒元年六月十二日奉

上諭劉長佑奏廣西現辦邊防右江鎮責任甚重請飭實任總兵
迅卽赴任等語廣西右江鎮總兵周盛傳現在能否前赴本任著
李鴻章體察情形據實具奏等因欽此遵查周盛傳自同治元年
帶勇隨臣赴滬蘇剿賊嗣是轉戰南非無役不從功績卓著現統
盛仁等軍馬步二十三營分紮津郡新城馬廠一帶籌辦海防拱
衛

畿輔布置嚴整訓練精強足備緩急之用連年督率所部建築新
城礮臺經辦開河屯田墾荒各工全賴該鎮籌畫調度一時難得
替人體察情形實未便令其前赴本任惟據劉長佑奏稱廣西現
辦邊防右江鎮責任甚重必須實任人員經理天津海防關係尤

爲緊要周盛傳既不能履任員缺未可久懸竊查有天津鎮總兵陳濟清籍隸湖南由廣西軍營勦賊立功保升總兵於粵西情形素甚熟悉且本係劉長佑於直督任內奏調北來前經臣奏派統帶津郡練軍赴奉天助勦業將大東溝股匪殲除不日即可凱撤該員勇幹明練熟諳戎機擬懇

天恩將直隸天津鎮總兵陳濟清與廣西右江鎮總兵周盛傳互相對調一轉移間似人地各得其宜如蒙

俞允俟陳濟清帶隊回津後交卸營務再由臣檄令馳赴廣西新任以期兼顧邊防臣爲權衡緩急因地擇人起見是否有當據實覆陳伏乞

聖鑒訓示謹附片具
奏

自省遞津添驛片

光緒元年六月二十九日

再天津靜海大城高陽等四縣向未設有驛站自同治九年督臣常駐津門並新設關道辦理通商事宜一切洋務海防往來文報駱驛刻不可緩而通省地方公牘多係自省遞津核辦該四縣已成驛路天津爲水陸交衝事更繁重必須添設驛馬乃可遞送無誤前據該縣等稟經飭司查得大道州縣額設驛馬六七十匹至百數十匹不等議將該縣等仿照大道州縣減半添設除原有遞馬外天津縣添馬五十匹馬夫二十五名靜海大城高陽等三縣各添馬三十匹馬夫十五名應需夫馬工料雜支各照例章核給以同治十年春季爲始按季在於司庫地糧項下撥領作正開銷其馬匹亦照例價由司撥款采買迄今察看情形原添夫馬可資周轉自應奏咨立案據藩臬兩司彙造清冊具詳前來除清冊分

咨戶兵二部查照外伏乞

聖鑒俯准添設以重驛務謹附片具

奏

祕魯換約事竣摺

光緒元年七月初八日

奏為祕魯國換約事竣恭摺具陳仰祈

聖鑒事竊臣鴻章等於六月十四日奉

上諭著派丁日昌辦理祕魯國互換條約事宜欽此同日又奉

上諭華工在祕魯各處山寮受其陵虐必須妥議辦法李鴻章擬

於前定查辦專條互換時再由換約大臣給與照會令將以前虐

待華人各情弊嚴為禁革之處即著照所擬辦理等因欽此並由

總理衙門發交蓋用

御寶條約二本前來當即函知祕使愛勒謨爾該使旋於六月二

十四日來謁臣日昌與之接晤告以祕魯華工現仍十分受虐必

須於換約時加給照會聲明此後當除去從前一切苛待弊端俟

覆文答應照辦方能換約該使始終狡執以現奉國主之命事辦

換約一事未經換約之前毫無事權不惟不能備文答應而且不能議論此事臣日昌仍與再三辯論該使怫然而去嗣各國領事密安士畢德格等亦復宛轉懇求願爲擔保謂換約後愛使必有照覆但事前不能先看臣等仍以原議拒之迨七月初一日英國漢文正使梅輝立來謁談及此舉謂照萬國公法未換約之前使臣實無權可議論公事其袒護之意尤爲顯然經臣鴻章反覆開導梅輝立始允向愛使熟商如何辦法初三日梅輝立來晤並呈伊代擬祕使照覆稿雖有答應除弊之語而尙未結實經臣等酌加增改數語強而後可卽經議定於初四日彼此換約梅輝立又求謂照會須作爲換約後口氣於愛使方無窒礙臣等亦復允之臣日昌於初四早前往答拜祕使愛勒謨爾英使威安瑪梅輝立等均在座因先索看祕使帶來條約有無錯誤威安瑪啟匣送閱

僅有英文日文二分條約專條裝潢華禮有其國王印押詢其何以無漢文條約等件威妥瑪等代答愛使在外國換約十數次均係如此辦理故漏未攜帶臣日昌告以中國總以漢文條約為憑若漏帶此件即彼此不能互換條約愛勒謨爾言漢文條約等件實在被國惟求先將用

寶之件彼此互換伊立即由電報通知該國數月內即可將漢文條約專條送到然後彼此將存件補換等由囑威妥瑪梅輝立再三代為情懇威妥瑪又云去年所立之約內有專條保護華工中國本佔便宜今愛使又許另立為華工除去一切苛待弊端文件若肯通融先行換約十數萬華工不知沾光多少等語臣日昌仍復允許回寓後臣鴻章與臣日昌熟商以此大威妥瑪為雲南之事氣倏張甚趁其有求於我稍為轉圜未嘗不可稍示勸懲其所

此舉於華工有益良亦不淺況從前義國換約情節與此正同
自可援照辦理臣日昌亦以爲然當於次日約愛勒漢爾梅輝立
晤商經臣等告以此次該使漏帶要件本難照辦因係威使等再
三懇懇始准通融茲將各用

御覽條約專條先行互換其餘洋文條約專條暫存天津海關道
署候祕國將漢文條約專條送到卽由津海關道與該使補換中
國不能再派換約大臣現在雖經互換約件然中國總以漢文爲
憑俟祕國將原訂漢文條約專條送到再爲刊刻通行如能一一
遵依用漢洋文寫在憑單內公同蓋印畫押方可將用

寶約件先行互換該使及梅輝立初有難色總求換約之後立刻
卽要通行事論良久而後定當於初七日互換用

寶之條約專條其祕國送來洋文條約專條責成梅輝立與緝譯

委員曾恆忠等詳細校對據云與中國所存洋文並無訛錯仍將此層列入憑單之內並將憑單執據及前議爲華工保護除弊照會及委員容閱所查口供見證一本並該使答應除去弊端照覆等件均於是日次第互換該使與梅輝立等言辭之間極爲恭順臣日昌因病甚先散上鴻章照章犒以酒食該使等再三稱謝而去除現存洋文條約專條等件由臣等會銜札發津海關道收存以備祕使隨時補換仍在憑單內議明俟該使將原訂漢文條約專條送到後再由臣鴻章

奏明刊刷通行各省知照其此次添議爲華工保護除弊照會照覆等件亦一併刊刻於條約之後謹將添議照會照覆各稿繕呈御覽至前奉換約

諭旨謹即封固繳回軍機處除將照會內鈔送各閱所查華工口

供見證一本及恩單約據等件分別咨呈軍機處總理衙門備查
其換到洋字用印條約及奉發未用之副本另行派弁送交總理
衙門查收辦理外所有祕國換約事竣緣由謹會同山驛覆

奏伏乞

皇太后

皇上聖鑒謹

奏

謹將祕傳換約添議照會照覆各稿照繕清單恭呈

御覽

給祕魯使臣愛勒謨爾照會

爲照會事照得本日本大臣與貴大臣已將彼此現存條約並專
條憑單等件互換案查前於十三年五月議約之後卽由本國派
委員於七月間前往貴國查明華工情形旋據送到華民呈詞口
供以及見證人所錄情形皆經指實華工所受委曲之處現在兩
國業已立約志在永遠和好務望貴大臣行知貴國查照妥將以
前苛待華工弊端盡行革除遵照專條及和約辦理嚴令將華工
身家資財皆得保護以昭信守本國亦當或派

欽差或派委員前往確查凡遇可以爲華工保護除弊之處隨時
商同貴國全力襄助妥立章程以歸盡善並附去華工見證供詞

一本爲此照會貴大臣請煩照覆施行須至照會者

外附華工見證供詞一本

祕魯使臣愛勒謨爾照覆

爲照覆事照得今接貴大臣來文內開我兩國所立條約並專條
兩件互換案查前於議約之後卽由本國派委員於七月間前往
查明華工情形旋據送到華民呈詞口供以及見證人所錄情形
皆經指實華工所受委曲之處現在兩國業已立約志在永遠和
好務望貴大臣行知貴國查照等因前來查華民在於本國傭工
者本國志在實力保護不容稍受委曲情事俟

貴國選派

欽差大臣前往本國商辦一切本國定必實力會商華工事宜以
期爲華工盡除一切弊端使其皆得安居身家資財無不護全以

符條約及專條所定章程並昭信守現准貴大臣送來華工見證
供詞一件本大臣自當譯出轉送回國查照辦理可也爲此照覆
貴大臣請煩查照施行須至照覆者

請遣使赴祕魯片

光緒元年七月初八日

再查祕魯華工約有十餘萬人受雇王陵虐之慘實爲目不忍見耳不忍聞去年委員容閱曾與該國官員爭論滿工者亦卽放出八十人可知該國雖素無教化然我苟有使臣在彼執定條約與之斷斷相持則華工既有呼籲之門自可漸免欺凌之弊前與該國所立專條條約於保護華工一層本已剴切言之現在加立照會復將除弊各層明白指出但我若無使臣在彼則華工相隔七八萬里其保護與否除弊與否烏從而知之卽知之又烏從而拯援之乎合無仰懇

天恩迅派正使副使前往祕魯按照條約等件凡遇可以爲華工保護除弊之處隨時商同該國妥立章程是此日在水火十數萬之華人將死而得生旣危而復安也伏查華民在東西南洋各島

人數不下百萬春閒王大臣等議辦海防本有招致各島華人之
議但平時既無相爲維繫之心則有事何以動其尊親之念今若
於祕魯古巴各島分別遣使設官拯其危急從此海外華民皆知
朝廷於絕島窮荒尙不忍一夫失所忠義之心不禁油然而動有
裨大局誠非淺鮮臣等爲仰體

皇仁拯援難民起見是否有當謹合詞附片陳明伏乞

聖鑒訓示謹

奏

嚴防誘拐華民片

光緒元年七月初八日

再祕魯各島等請分遣使臣所以保護既往之華人也而將往未往之華人尤不可不預早圖維致人陷阱查澳門等處向設有招工局卽俗名豬仔館愚民一人局中遂致長逝不返比聞澳門之大西洋官經英人責以大義業已停止招工然暗中招雇仍所不免其次如汕頭廈門及閩粵二省不通商口岸往往有夾板輪船私自前往販買人口現在祕魯條約內既議明別有招致之法均非所准并澳門及各口不准誘騙一層地方官若能妥立善法當可潛杜奸謀合無仰懇

天恩飭下廣東福建督撫臣等同官紳按照條約妥擬杜弊章程奏明實力照辦務使內足以防誘拐之奸而外足以杜遠人之口至總稅務司及閩粵各口稅務司久悉誘拐確情於杜弊之法必

有確見與知可以兼收並采可否

飭總理衙門轉行總稅務司及閩粵各口稅務司一併妥議稽查
拐騙之法呈覆未擇施行至該口稅務司如查有拐騙華民出洋
約幾起以上人數約幾十以上似當酌加獎勵庶足以示鼓舞臣
等爲防範未然起見是否有當伏乞

聖鑒訓示謹
奏

淮軍西征報銷摺

光緒元年七月二十八日

奏爲淮軍調駐陝西等省軍需自同治十一年正月起截至是年十二月底止收支款目造冊報銷恭摺仰祈

聖鑒事竊照淮軍西征軍需前截至同治十年十二月底止業經列爲第一案報銷於十二年四月十一日具

奏旋經戶兵工各部核覆准銷並經戶部以例無柴草油燭折價名目駁令嗣後報銷須照定例章程辦理所有此項折價應卽刪除等因臣以同治十三年以前循案已經發過柴草油燭折價銀兩該弁勇等久經領用礙難紛紛追回致案軍令請俟造報時仍照案核銷其自光緒元年正月起另照例章核辦於本年二月十五日奉

旨著照所請戶部知道欽此其餘戶部行查各項亦均查明例案

分晰造冊登覆並另行開單附

奏各在案茲查准軍除提督吳長慶統帶慶字親兵八營提督劉
玉龍開花礮隊一營駐防江蘇仍循舊撥歸蘇省留防軍需案內
彙銷此外調駐陝西直隸湖北等省軍需用款自同治十一年正
月起至是年十二月底止列爲第二案所有馬步水師各營同提
督曹克忠由津赴陝接統銘軍十年十月起添募營哨統歸此案
彙銷以上營哨官弁員名勇夫總數征防處所先經造冊分咨軍
機處戶兵二部備查至馬步水陸各營薪費口糧正雜等項概循
前案仍照楚軍刊本營制並奏定章程及准銷成案接續造報其
購買駝騾鞍架製造軍裝器械工價並提督曹克忠開差雇用船
車騾頭夫工價腳悉照軍需例案並應准銷成案核發其馬隊
各營倒補馬匹係照駐紮省分營驛例價分別支銷轉運軍火餉

械雇車輶駝夫役價腳等項按照斤重及程途里數例價核
實給發均屬實用實銷飭將截至十一年十二月止收支細數趕
緊分晰造報今據報銷局司道等詳稱舊管項下上屆截至同治
十一年十二月底止共銀四十九萬七千六百五十六兩一錢零新
收項下綜計山東浙江四川等省協餉並提撥湖北江蘇藩關釐
局軍餉兩淮鹽釐及本案扣存平餘同收回第一案兵部核棚駝
夫獸醫工食等款共銀三百八十六萬九千一百四十二兩五錢
有奇以上管收二項共銀四百三十六萬六千七百九十八兩六
錢有奇內登除前副都統溫德勒克西卹賞銀一百九十二兩九
錢有奇又附列專冊請銷補放淮軍陸勇水師各營同治十年底
以前欠餉銀六十五萬五千二百三十三兩九錢有奇又本案附
請專案

奏銷洋鎗礮隊教習辛工等項兩冊其銀一十四萬八千五百四兩三錢有奇實計收用銀三百五十六萬二千八百六十七兩三錢有奇開除正雜各款遵照部議酌定軍需報銷章程各歸各款核銷計應歸戶部核銷銀三百萬三千六百八十六兩有奇應歸兵部核銷銀九萬四千二十六兩九錢有奇應歸工部核銷銀十一萬一千二百一十七兩六錢有奇統共請銷銀三百二十萬八千九百三十兩六錢有奇實存銀三十五萬三千九百三十六兩七錢有奇已接支同治十二年分餉項歸於後案舊管項下滾接造報等情具詳請

奏前來臣伏查此次造報准軍馬步水師各營勇丁遵照部咨開報化名清冊正雜款項概發湘平折實庫平報銷仍扣雜款一分平餘均係循照應辦成案實用實銷並無絲毫浮冒除將細冊分

咨各部並飭將以後用款趕緊接續清理造報外謹將淮軍調駐
陝西等省軍需收支款目造冊報銷緣由專摺具
奏並繕清單恭呈

御覽伏乞

皇太后

皇上聖鑒謹

奏

謹將同治十一年正月起截至是年十二月底止淮軍調駐
陝西直隸等省軍需收支正雜各款繕具清單恭呈

御覽

計開

舊管

一上屆淮軍西征軍需報銷同治十年十二月底止實存銀四十
九萬七千六百五十六兩一錢四分六釐九毫六絲二微五纖
新收

一收山東省協餉共撥解銀六萬兩

一收浙江省協餉共撥解銀十二萬兩

一收四川省協餉共撥解銀十四萬兩

一收湖北省軍需局共提撥沙平銀三十六萬兩合湘平銀三十五

萬九千七百四十八兩

一收湖北江漢關其提撥四成洋稅庫平銀二十四萬兩合湘平銀二十四萬八千二百五十六兩

一收湖北江漢關其提撥六成洋稅關平銀三十六萬兩合湘平銀三十六萬六千四十八兩

一收蘇州藩司庫其提撥銀二十四萬兩

一收江南海關其提撥銀六十萬兩

一收江蘇釐捐總局其提撥釐捐銀一百萬一千九兩六分二釐

九絲四忽

一收鄂岸鹽釐其提撥銀一十九萬一千四百三兩六分一釐五

毫九絲八忽五微

一收湘岸鹽釐其提撥銀四萬五千六百兩

一收西岸鹽釐共提撥銀五十一萬二千四百三十五兩三錢四分四釐

一收皖岸鹽釐共提撥銀一萬七千六十一兩七錢二分

一收本案轉運價腳采買製造等項共扣存平餘銀一千四百一十二兩一錢九分五釐二毫九絲四忽二微

一收回上屆淮軍西征軍需同治十年底止第九冊內請銷駝夫獸醫工食奉刪追繳歸款共湘平銀一千三百一十四兩七錢四分

以上管收二項共庫平銀三百四十二萬五千五百九十七兩五錢二分九釐九毫四絲六忽九微五纖

湘平銀九十七萬五千三百六十六兩七錢四分析庫平銀九十四萬一千二百一兩一錢三分八釐六毫六絲六忽四

微

共計庫平銀四百三十六萬六千七百九十八兩六錢六分

八釐六毫一絲三忽三微五纖

登除項下

一撥放記名都統前正黃旗漢軍副都統溫德勒克西病故卹賞
湘平銀二百兩折合庫平銀一百九十二兩九錢九分四釐三毫

七忽

一附列本案專冊請銷補放淮軍陸勇水師各營同治十年底以
前欠餉銀六十五萬五千二百三十三兩九錢三分二毫三絲三
忽

一附列本案第一冊請銷淮軍陸勇各營洋鎗礮隊教習通事工
匠人等辛工等項銀三萬二千八百八兩四錢二分五釐一毫六

絲五忽

一附列本案第二冊請銷製造西洋礮火各局工匠料物並購買外洋軍火價值等項銀一十一萬五千六百九十五兩九錢一分九釐六絲一忽

以上登除並附列請銷各款其庫平銀八十萬三千九百三十一兩二錢六分八釐七毫六絲六忽

實計收用庫平銀三百五十六萬二千八百六十七兩三錢九分九釐八毫四絲七忽三微五纖

開除

一第一冊請銷淮軍原募續添馬步各營統領營哨官弁勇夫薪糧等項內歸戶部核銷薪費口糧馬乾等銀二百六十三萬一千九百一十兩九錢六分一毫九絲二忽八微兵部核銷倒補馬價

銀九千八百五十六兩二錢一分九釐二毫四絲一忽

一第二冊請銷督標水師各營營哨官弁勇丁薪糧等項係歸戶部核銷銀七萬五千一兩九錢一分六毫四絲四忽

一第三冊請銷隨營辦事支應各差京外文職官員薪糧等項係歸戶部核銷銀三萬二百五十七兩六錢四分七釐三毫九絲九忽

一第四冊請銷隨營先鋒差遣武職官弁薪糧等項係歸戶部核銷銀三萬二千七十三兩二錢四分一釐三毫三絲九忽

一第五冊請銷武職大員在營借支養廉係歸戶部核銷銀九百六十四兩九錢七分一釐五毫三絲三忽

一第六冊請銷淮軍馬步各營柴草油燭折價駝騾購車喂養車輛雇價等項內歸戶部核銷柴草油燭折價駝騾購車喂養等銀

二十一萬六千一百五十九兩九錢九分二釐二毫八絲兵部核銷車輛雇價銀四萬六千九百四十五兩八錢六分五釐九絲七忽

一第七冊請銷淮軍馬步水陸各營哨弁勇夫陣亡病故受傷卹賞係歸兵部核銷銀四千五百二十八兩六錢一分一釐四毫六忽

一第八冊請銷購買馱驢價似並駝驢馬喂養夫工等項內歸戶部核銷購驢價值並駝驢馬喂養等銀一萬七千三百一十七兩三錢一分一釐五毫八絲九忽兵部核銷夫工銀三百七十六兩二錢八分一釐

一第九冊請銷各臺局所水陸轉運餉械並提督臣克忠由津赴陝開差雇備船隻車驢夫工價腳等項係歸兵部核銷銀三萬二

千三百一十九兩九錢九分三釐六毫三絲一忽

一第十冊請銷采辦物料製造軍裝器械工價並油艚船隻經費等項係歸工部核銷銀一十一萬一千二百一十七兩六錢八分六釐九毫二忽

以上第一冊至第十冊止其歸戶部核銷銀三百萬三千六百八十六兩三分四釐九毫七絲六忽八微兵部核銷銀九萬四千二十六兩九錢七分三毫七絲五忽工部核銷銀一十一萬一千二百一十七兩六錢八分六釐九毫二忽統計十冊共請銷銀三百二十萬八千九百三十兩六錢九分二釐二毫五絲三忽八微

實在

存銀三十五萬三千九百三十六兩七錢七釐五毫九絲三忽五

微五纖

查前項實存銀兩已接支同治十一年分餉項應歸後案舊管項下滾接造報理合登明

一同治十一年正月起截至是年十二月底止其欠發淮軍陸勇各營餉銀二十七萬一千九百三十一兩六錢八分一釐九毫四絲二微

一同治十一年正月起截至是年十二月底止其欠發督標水師各營餉銀四千七百四十三兩八錢二分

以上其欠發餉銀二十七萬六千六百七十五兩五錢一釐九毫四絲二微續有補給銀款月歸後案專冊開報理合登明

軍營交涉洋務銷冊片

光緒元年七月二十八日

再查淮軍陸勇各營洋鎗礮隊教習通事工匠人等辛工等項前截至同治十年底止業經另開清單附

奏准銷在案今自同治十一年正月起淮軍陸勇各營洋鎗礮隊教習通事工匠人等辛工行營製造洋礮局工料及購買外洋軍火等項均截至是年十二月底止金陵機器製造局用款截至十二年五月底止其請銷銀十四萬八千五百四兩三錢有奇茲據該司道等按款覆加查核均係奉文飭發並無浮冒另造細冊詳請附

奏請銷前來臣查前項淮軍陸勇各營洋鎗礮隊教習通事工匠人等辛工各款皆與洋人交涉無例可循仍應專案核實請銷除將細冊咨送總理衙門戶兵工部查覈外伏乞

聖諭附片具

奏

軍營柴草議價核發片

光緒元年七月二十八日

再查柴草油燭二項本爲軍營所必需准湘各軍歷經奏定酌予折價准銷在案上年十月二十九日戶部奏覆淮軍西征報銷案內聲稱軍需例載官兵日給口糧并量給柴薪以資食用並無柴草油燭折價名目駁令嗣後報銷須查照定例章程辦理所有此項折價應即刪除等因臣以同治十三年以前遵照奏案已經發過折價銀兩該弁勇等久經領用礙難紛紛追回致紊軍令請俟造報時仍照案核銷其自光緒元年正月起另照例章核辦奏奉諭旨允准一面分飭各營局妥議去後茲據先後稟覆遵將油燭一項停支由營官暫於公費內購用其柴草日需炊爨樵采易致騷擾定例雖無折價名目有量給柴薪明文請照例核發前來臣查例載官兵每名量給柴薪以資食用又註云原擬兵丁供應口

糧准銷今酌擬加給柴薪亦准報銷各等語所有淮軍各營支領柴薪一項自光緒元年以後應遵部咨查照例章核辦惟例內並未明定每名應支斤重數目淮軍調紮直隸山東江蘇臺灣等處沿海設防就地采買木柴稻草豆麥秫稻不等各處時地情形不同市價斷難畫一必須酌定斤重及價值數目方符量給例意今擬每名日給本色三斤由各營隨地購辦不論柴草名目每斤照市價通牽合錢三文合銀一釐八毫如此定出本色斤數一律價值皆照向章格外覈減不能再有短少擬請即按此數核發以示限制庶行軍不致掣肘造報不致紛歧經費節省亦較多矣合無仰懇

天恩飭部查照立案以恤兵艱理合附片具陳伏乞

聖鑒訓示謹

卷八

西征扣贖片

光緒元年七月二十八日

再准軍西征軍需自同治九年四月起至十年十二月底止造冊
報銷一案經戶部分別准駁行查續准將柴草油燭折價官役騎
騾腳力醫省代辦糧價核覆准銷在案所有行查病故馬步兵勇
隨時挑補並無空曠一節緣准軍統領營官向有隨帶餘勇於所
支公費內酌給口食遇有勇丁病故等事卽於此項餘勇內隨時
挑補如陝防銘字等營告假汰弱勇丁爲數較多除餘勇挑補外
仍有空額亦已聲明扣曠核實造報有案此外行查各款計其銀
四十萬二百七十五兩有零經臣飭據報銷局司道逐一查核例
章與准銷成案按款分晰彙敘彙開登覆清冊咨送戶部核銷去
後茲准部咨此案係奏明行查俟奏報到日再行按冊核辦等因
理合查照登覆原冊繕具簡明清單恭呈

御覽伏乞

聖鑒敕部知照謹附片具

奏

謹將淮軍西征軍需自同治九年四月起至十年十二月止
報銷案內戶部行查各款繕具簡明清單恭呈

御覽

計開

一部查銘字與武毅軍馬隊哨官哨長什長親兵馬勇支食薪糧
未照楚軍營制一律開支又督隊獸醫兩項與楚章不符等因遵
查前項各款係照銘軍初立馬隊章程核准開支此次西征仍遵
歷屆准銷成案接符支給並無兩歧計原造請銷銀六萬七千八
百三十兩二分

一部查勳字後營幫帶官營務處哨官護衛鎗隊教習支食薪糧
公費照何例章支給等因遵查勳字後營內開花礮隊從前本係
派員管帶月支薪費銀八十兩嗣裁留一哨仍令總兵彭勝彪作

爲幫帶減給薪費銀五十四兩又教習口糧銀數係仿照教練營章程酌定支給歷屆准銷在案至營務處哨官一員因所帶勇夫共一百八十八名酌定支給薪費按楚章一營五哨之制科算有減無浮計原造請銷銀二千一百八十七兩二錢

一部查總理盛仁武毅銘字馬步全軍營務處並管理駝騾廠務各員月支薪糧公費差遣先鋒及隨營護運糧餉軍械員弁薪糧多寡不等並未照例分晰開列等因遵查前項文武各員弁應支薪糧均係循照剿捻軍需准銷成案按差事之繁簡定薪糧之多寡分別支給若照應支分例細數統計比算節省較多其公費一項營務處暨駝騾廠馬步勇夫六百五十四人置辦旗幟號往並喂養駝騾需用各項器具及匠役書識工食等項皆從公費內支給並不另行開銷前於剿捻軍需尾案造報准銷在案此次酌定

循案支給計原造請銷銀三萬二千八百一兩八錢

一部查隨營辦事支應轉運並先鋒差遣文武員弁支過薪糧夫價照何例案等因遵查湘軍第五案並剿捻軍需各案內歷經奏明不論官階大小均按差使繁簡定支銀多寡量時地以爲增減歷經報部准銷有案此次仍按差使繁簡支給若照軍需例案比計非但無浮實係節省較多計原造請銷文職薪糧等項銀七萬九百二十一兩四錢又武職薪糧等項銀五萬六千五百六十八兩六錢

一部查周盛傳借廉銀五千兩唐仁廉借廉銀三千兩均係借支何年廉銀等因遵查廣西右江鎮總兵周盛傳自同治六年六月初四日在營接劄日起至十一年三月底止貴州安義鎮總兵唐仁廉自同治六年十二月初十日在營接劄日起至九年三月底

止各支本任勻閩全廉業經分咨廣西貴州各原省飭司扣給毋庸解還計原造共請銷銀八千兩

一部查准軍西征馬步各營支領車騾喂養一項應令聲明每車騾頭數目等因遵查馬隊刊章每哨給車一輛購車每輛不論套數月支喂養銀十四兩業於剿擒軍需各案造報准銷今均循案支給至駝騾喂養一項臣於同治十年五月

奏定每營月給駝騾喂養銀一百兩凡一營六哨者月支銀一百五十兩經部行文遵照在案即照酌定支數按月給予喂養計原造請銷銀九萬三千一百六十四兩

一部查采買駝駝價值解駝官弁牧丁回旗路費因何不符至駝騾馬匹日支喂養及解駝官弁牧丁人等守候薪糧係照何章支給等因遵查勘捻時需用駝駝係在口外出產地方采買其價稍

廉西征時因軍務緊急飭在內地采買價值稍昂先後時地不同價值不一要皆核實造報又勘捻軍需初案內察哈爾撥馬一千匹解馬官兵先後共給回旗路費銀四百八十兩今察哈爾西林果勒捐駱駝一千匹解駝官兵牧丁人等共給回旗路費銀三百二十四兩均按人數多寡支給核與前案有減無浮至頭起解駝官弁牧丁人等在營守候支給薪糧實以遠道來營暫留照料喂養按日酌給薪糧錢文以資口食並無定章其駝騾馬匹喂養並駝騾廠日需草料係照蘇滬軍需案內馬乾准銷成案無分駝騾馬匹每隻日給銀一錢卽令經管員弁自購草料喂養以示限制計原造請銷銀八萬三千三百三十二兩九錢二分八釐六毫

以上部查各款原造共請銷折實庫平銀四十萬二百七十五兩九錢三分二釐二毫五絲九忽均係查照例章准銷成

案分別核實支給並無浮冒業經按款分晰聲敘彙開登覆
清冊咨送戶部核銷在案合並聲明